



16. august 2012

UKA 2012/159

Inatsisartut Suleriaasianni § 36 innersuussutigalugu apeqquteqaat allaavigalugu Inatsisartuni oqallisissiamik siunnersuut imaattoq saqqummiuppara:

Sulinermik inuussutissarsiortuunerup qanoq ililluni imminut akilersinnaanerulernissaata qulakkeernissaa pillugu apeqquteqaat aallaavigalugu oqallinnissamik siunnersuut.
(Inatsisartunut ilaasortaqaq Finn Karlsen, SIUMUT)

Tunngavilersuut:

Taamatut qulequtserlugu Inatsisartunut apeqquteqaat aallaavigalugu oqallittoqarnissaanik siunnersuuteqarninnut tunngaviuvoq ukiuni kingullerni kalaaleqatigut nunaqqatigut inigisaminnit anisitaasartut amerliartuinnarnerat isiginngitsuusaaginnarneqarsinnaajunnaarmat.

Tamakku ilaat suliffissaaleqinermik nalaanni akiitsoqalersimasuupput allallu qaammammut aningaasartutitut pisariaqarnerpaanut matussisiinissamut akissaqanngivissulersimallutik.

Allaammi inuit ilaannut aningaasaqarneq eqqarsaatigalugu atukkat imaalersimapput apeqqutaajunnaarsimalluni suligaanni sulinnikkaluaraanniluunniit.

Ilaatigooriarluni sulisartoq ilinniagaqarsimanngitsoq suliffissaqannginnini pissutigalugu pisortanit aningaasanik ikiorserneqartoq sulileqqinnermini aningaasanik ikiorsiissutaasimasunik utertitsilluni akiliisariaqartarpoq, taamaalilluni inuit ilaasa qaammammut aningaasartuutat piffissami sivisuumi marloriaatinngorsinnaasarpulutik. Inuit ilaat pissutsit taamatut ilersimanerannut tunniutiinnartutullusooq ittarput, taakkunungami isumaginninnermik tapiissutinik pissarsiaqartuuneq ”imminut akilersinnaanerulersimasarmat”.

Pissutsit taamatut naleqqutinngitsumik inissisimanerat qanoq iliuuseqarfigisariaqarparput, inunnik suliffissaarukkallartartunik ikiuisinnaanermut pikkorinnerulertariaqarpugut. Inunnut ataasiakkaanut suliffeqarneq peqqinnarneruvoq, inuiaqatigiinnillu nuannaartunik, imminut ilaqtanullu pilersuisinnaasunik innuttaqarneq peqqinnarnerullunilu aningaasaqarnikkut illersorsinnaanerummat.

Pissutsit pitsaangitsut tamakku aamma pissutaallutik nunaqqatitta amerliartuinnartut inuuniarnermikkut atukkamik pitsaanerulernissaanik neriuuteqarlutik Danmarkimut nuuttalernerannut sunniuteqaqataasimasinnaanerat ilimagisinnaavarput. Tamatumali akerlianik nunanit allaniit nunatsinnut nutserartut amerligaluttuinnarlutik.

Pissutsit ataqatigiinngillat. Nunani allamiumut Kalaallit Nunaannut nuulluni sulilerneq imminut akilersinnaappat taava aamma minnerpaamik Kalaallit Nunaanni kalaallimut kimulluunniit suliffeqarneq akilersinnaasariaqarpoq. Matumani nunani allamiut nunatsinnut tikilluaqquneqannginnerat pineqanngilluinnarpoq. Kikkulluunniit qanoq ammimikkut qalipaateqarnerat, qanoq upperisaqarnerat imaluunniit suminggaanneernerat apeqqutaatinnagit nunatsinnut tikilluaqqusaajuannarput, tikilluaqqusaajuassallutillumi. Taamattoq nunani allamiut

nunatsinnut suliaartortut nunaqavissut akiliutaasa assigninik akiliisariaqarput pisortallu sullissiviini sullinneqarniarunik allatuulli aamma utaqqillutik siuleriiaattut tunuanut inissittariaqarlutik.

Sulinermik inuussutissarsiuteqartut akissarsiaat ukiuni kingullerni annikitsuinnarmik qaffariaateqarsimapput akerlianillu nerisassat, ineqarnermut akiliutit orsussallu ikummatissat akii annertuumik qaffariarsimallutik.

Assersuutigalugu SIK-p Namminersorlutillu Oqartussat isumaqatigiissutaat 18. september 2009-mi atsiorneqarsimasut malillugit sulisartut suliamik ilinniagaqarsimannngitsup akunnermusiassai 1. april 2009-miit 1. april 2011-mut taamaallaat 5%-imik qaffanneqarsimapput. Piffissami tassani Niuernermi allaffinnilu sulisutut ilinniagallip ukiup qulingiluassaat overassistentitut atorfeqareerluni qaammammusiassai taamaallaat 3,7%-inik aamma qaffanneqarsimallutik.

Akerlianik Kalaallit Nunaanni Naatsorsueqqissaartarfiup kisitsisaatai malillugit nerisassat akii januar 2009-miit juli 2011-mut 10,9%-imik qaffassimapput, taamatuttaaq ineqarnermut akit 8,4%-imik qaffassimallutik. Aamma Nukissiorfiit kisitsisaataat malillugit illoqarfiit ilaanni kallerup innerata akia 1. marts 2009-miit 1. august 2011-mut 23%-inik qaffanneqarsimavoq. Tammakua qaffariaatit saniatigut orsussaq aamma akitsoraluttuinnarsimavoq, assersuutigalugu petroleummip kiassarnermut atorneqartartup akia 7. Februar 2009-miit 8. Juli 2011-mut 29,7%-imik qaffanneqarsimavoq.

Inuiaqatigiit akornanni taamaattoqarnera oqallisigineqanngippallaarsoraara.

Aasap ingerlanerani aalisakkanik suliffeqarfinni sulisussaaleqineq tusagassiutit aqutugalugit saqqummiunneqarpoq, sooq suliffeqarfiit sulisussaaleqippat?

Innuttaasut sulerusussuseqalersittariaqarpavut, suliffeqartuuneq qaqugukkulluunniit imminut akilersinnaasariaqarpoq!

Innuttaasut inuiaqatigiinnut napatitseqataanerat eqqarsaatigalugu ajornartorsiusersunnginnissaat qulakkeertariaqarparput.

Siumut sinnerlugu neriuppunga partiit tamatta, ullumikkut pissutsit ajornartorsiutaasut aaqqinnissaat siunertaralugu oqallilluassasugut.